

摛藻堂四庫全書薈要

史部

欽定四庫全書 舊要卷五千四百四十六

舊五代史卷四十五

宋門下侍郎參知政事監修國史薛居正等撰

唐書第二十一

閔帝紀

閔帝諱從厚小字菩薩奴明宗第三子也母昭懿皇后
夏氏以天祐十一年歲在甲戌十一月二十八日庚申
生帝于晉陽舊第帝髫龀好讀春秋畧通大義貌類明

宗尤鍾愛天成元年授金紫光祿大夫檢校司徒二年
四月加檢校太保同平章事河南尹判六軍諸衛事十
一月加檢校太傅三年三月授汴州節度使四年移鎮
河東長興元年改授鎮州節度使尋封宋王二年加檢
校太尉兼侍中移鎮鄆都三年加中書令秦王從榮帝
同母兄也以帝有德望深所猜忌帝在鄆宮恒憂其禍
然善于承順竟免間隙四年十一月二十日秦王誅翼
日明宗遣宣徽使孟漢瓊馳馮召帝二十六日明宗崩

二十九日帝至自鄴十二月癸卯朔發喪于西宮帝于
柩前即位丁未羣臣上表請聽政表再上詔允己酉中
外將士給賜有差庚戌帝線服見羣臣于廣壽門之東
廡下宰臣馮道進曰陛下久居哀毀臣等咸願一覩聖
顏朱弘昭前舉帽羣臣再拜而退御光政樓存問軍民
辛亥賜司衣王氏死坐秦王事也癸丑以前鎮州節度
使涇王從敏權知河南府事尋以盧質代之乙卯賜司
儀康氏死事連王氏也丙辰以天雄軍節度判官唐汭

為諫議大夫掌書記趙彖為起居郎元從都押衙宋令
詢為磁州刺史丁巳以左僕射平章事馮道為山陵使
戶部尚書韓彥惲為副中書舍人王延為判官禮部尚
書王權為禮儀使兵部尚書李鏘為鹵簿使御史中丞
龍敏為儀仗使右僕射權知河南府盧質為橋道頓遞
使庚申以前相州刺史郝瓊為右驍衛大將軍充宣徽
北院使以光祿卿充三司副使王政為三司使癸亥故
檢校太尉右衛上將軍充三司使孫岳贈太尉齊國公

丁卯帝釋纁服羣臣三上表請復常膳御正殿從之辛
未帝御中興殿羣臣列位馮道升階進酒帝曰比于此
物無愛除賓友之會不近樽筳況在沈痛之中安事飲
啖命徹之

應順元年春正月壬申朔帝御廣壽殿視朝百寮詣閣
門奉慰時議者云月首以常服臨不視朝可也乙亥契
丹遣使朝貢

遼史太宗紀天顯九年閏月戊午唐遣使來告哀即日遣使祭弔

丁丑以

太常卿崔居儉為秘書監以前蔡州刺史張繼祚為左

武衛上將軍充山陵橋道頓邇副使戊寅御明堂殿仗
衛如儀宮懸樂作羣臣朝服就位宣制大赦天下改長
興五年為應順元年時議者以梓宮在殯宮懸樂作非
禮也懸而不作可也迴鶻可汗仁美遣使貢方物故可
汗仁裕進遺留馬是日命中使三十五人以先帝鞍馬
衣帶分賜藩位庚辰宰臣馮道加司空李愚加右僕射
劉昫加吏部尚書餘並如故壬午侍衛親軍馬步軍都
指揮使河陽節度使康義誠加檢校太尉兼侍中判六

軍諸衛事甲申以侍衛馬軍都指揮使寧國軍節度使
安彥威為河中節度使以侍衛步軍都指揮使忠正軍
節度使張從賓為涇州節度使並加檢校太傅以捧聖
左右廂都指揮使欽州刺史朱洪寶為寧國軍節度使
加檢校太保充侍衛馬軍都指揮使以嚴衛左右廂都
指揮使巖州刺史皇甫遇為中正軍節度使檢校太保
充侍衛步軍都指揮使戊子樞密使檢校太尉同平章
事朱弘昭樞密使檢校太尉同中書門下二品馮贊並

加兼中書令北京留守河東節度使兼大同彰國振武
威塞等軍蕃漢馬步總管石敬瑭加兼中書令幽州節
度使檢校太尉兼中書令趙德鈞加檢校太師兼中書
令樞密使馮贊表堅讓中書令制改兼侍中封邠國公
庚寅鳳翔節度使潞王從珂加兼侍中青州節度使檢
校太尉兼中書令房知溫加檢校太師辛卯以翰林學
士承旨尚書右丞李擇為工部尚書以秘書監盧文紀
為太常卿充山陵禮儀使壬辰荆南節度使檢校太尉

兼中書令高從誨封南平王湖南節度使檢校太尉兼
中書令馬希範封楚王甲午兩浙節度使檢校太師守
中書令吳王錢元瓘進封吳越王前洛州團練使皇甫
立加檢校太保充鄆州節度使前彰義軍節度使康福
加檢校太傅充邠州節度使劍南東西兩川節度使檢
校太尉兼中書令蜀王孟知祥加檢校太師制下知祥
辭不受命丙申鎮州節度使檢校太尉兼侍中范延光
汴州節度使檢校太尉兼侍中趙延壽並加檢校太師

戊戌山南西道節度使檢校太傅同平章事張虔釗襄

州節度使趙在禮並加檢校太尉辛丑以振武軍節度

使安北都護楊檀兼大同彰國振武威塞等軍都虞侯

充北面馬軍都指揮使閏月壬寅朔羣臣赴西宮臨癸

卯御文明殿入閣以前右僕射權知河南府事盧質為

太子少傅兼河南尹以諫議大夫唐汭膳部郎中知制

誥陳乂並為給事中充樞密院直學士

通鑑汭以文學從帝應三鎮在

幕府及即位將佐之有才者朱馮皆斥逐之汭性迂踈
朱馮恐帝含怒有時而發乃引汭于密近以其黨陳乂

監之宣徽南院使驃騎大將軍左衛上將軍知內侍省孟

漢瓊加開府儀同三司賜忠貞扶運保泰功臣丙午正
衛命使冊皇太后曹氏戊申以前雄武軍節度使劉仲
殷為右衛上將軍邢州節度使趙鳳加爵邑自是諸藩
鎮文武臣寮皆次第加恩帝嗣位覃恩澤也以翰林學
士中書舍人崔稅為工部侍郎依前充職以給事中張
鵬為御史中丞以御史中丞龍敏為兵部侍郎以太僕
少卿竇維為大理卿甲寅正衛命使冊皇太后王氏集

賢院上言準勅書修創凌煙閣尋奉詔問閣高下等級
謹按凌煙閣都長安時在西南三清殿側畫像皆北面
閣有中隔隔內面北寫功高宰輔南面寫功高諸侯王
隔外面次第畫圖功臣題贊自西京板蕩四十餘年舊
日主掌官吏及畫像工人並已淪喪集賢院所管寫真
官畫真官人數不少都洛後廢職令將起閣望先定佐
命功臣人數請下翰林院預令寫真本及下將作監興
工次序間架修建乃詔集賢御書院復置寫真官畫真

官各一員餘依所奏丁巳安州奏此月七日夜節度使
符彥超為部曲王希全所害廢朝一日戊午以前振武
軍節度使安北都護高行周為彰武節度使辛酉以前
鄆州使范政為少府監丙寅幸至德宮車駕至興教門
有飛鳶自空而墜殞于御前是日大風晦冥二月乙亥
以前鎮州節度使涇王從敏為宋州節度使己卯以前
徐州節度使檢校太傅李敬周為安州節度使是日宣
授鳳翔節度使潞王從珂為權北京留守以北京留守

石敬瑭權知鎮州軍州事以鎮州范延光權知鄆都留守事以前河中節度使洋王從璋權知鳳翔軍軍府事庚寅幸山陵工作所是日西京留守王思同奏鳳翔節度使潞王從珂拒命丁酉王思同加同平章事充西面行營都部署以前邠州節度使藥彥稠為副部署以河中節度使安彥威為西面兵馬都監以前定州節度使李德珫為權北京留守山陵使奏伏覩御札皇帝親奉靈駕至園陵伏見累朝故事人君無親送葬之儀請車

駕不行不從乙未樞密使馮贊起復視事時贊丁母憂
也己亥以司農卿張鎛為殿中監庚子殿直楚匡祚
上言監取亳州圍練使李重吉至宋州繫於軍院重吉
潞王之長子及幽於宋州帝猶以金帛賜之及聞西師
咸叛方遣使殺之三月甲辰以前太僕少卿魏仁鍔為
太僕卿興元節度使張虔釗奏會合討鳳翔丙午以右
領衛上將軍武延翰為郢州刺史丁未洋州孫漢韶奏
至興元與張虔釗同議進軍己酉以鎮州節度使范延

光依前檢校太師兼侍中行興唐尹充天雄軍節度使
北面水陸轉運制置使以北京留守河東節度使石敬
瑭依前檢校太尉兼中書令其真定尹充鎮州節度使
大同彰國振武威塞等軍蕃漢馬步總管如故辛亥以前定
州節度使李德珫為北京留守充河東節度使許王從益加
檢校太保前河中節度使洋王從璋加檢校太傅詔蕃侯帶平章
事以上薨許立神道碑差官撰文未帶平章事及刺史準令合立碑
者其文任自製撰不在奏聞乙卯興元張虔釗奏自鎮將

兵赴鳳翔收大散關宗正寺奏準故事諸陵有令丞各
一員近例更委本縣令兼之緣河南洛陽是京邑兼令
丞不便詔特置陵臺令丞各一員已未以前金吾大將
軍李肅為左衛上將軍充山陵修奉上下宮都部署庚
申西面步軍都監王景從等自軍前至奏今月十五日
大軍進攻鳳翔十六日嚴衛右廂都指揮使尹暉引軍
東面入城右羽林都指揮使楊思權引軍西面入城山
南軍潰帝聞之謂康義誠等曰朕幼年嗣位委政大臣

兄弟之間必無榛梗諸公大計見告朕獨難違事至于此何方轉禍朕當與左右自往鳳翔迎兄主社稷朕自歸藩于理為便朱弘昭馮贊不對義誠曰西師驚潰益由主將失策今駕下兵甲尚多臣請自往關西振其兵威扼其衝要義誠又累奏請行帝召侍衛都將以下宣曰先皇帝棄萬國朕于兄弟之中無心爭立一旦被召主喪便委社稷岐陽兄長果致猜嫌卿等頃從先朝千征萬戰今日之事寧不痛心今據府庫悉以頒賜卿等

勉之乃出銀絹錢厚賜于諸軍是時方事山陵復有此
賜府藏為之一空軍士猶負賞物揚言于路曰到鳳翔
更請一分其驕誕無畏如是辛酉幸左藏庫視給將士
金帛是日誅馬軍都指揮使朱弘實坐與康義誠忿爭
故也癸亥以康義誠為鳳翔行營都招討使餘如故以
王思同為副招討使以安從進為順化軍節度使充侍
衛馬軍都指揮使詔左右羽林軍四十指揮改為嚴衛
左右龍武神武軍改為捧聖甲子陝州奏潞王至潼關

害西面都部署王思同乙亥宣諭西面行營將士俟平
鳳翔日人賞二百千府庫不足以宮闈服玩增給詔侍
衛馬軍都指揮使安從進京城巡檢是日從進已得潞
王書檄潛布腹心矣丁卯潞王至陝州戊辰帝急召孟
漢瓊不至召朱弘昭弘昭懼投於井安從進尋殺馮贊
于其第是夜帝以百騎出玄武門謂控鶴指揮使慕容
遷曰爾誠有馬控鶴從予及駕出即閨門不行遷乃帝
素親信者也臨危如是人皆惡之是月二十九日夜帝

至衛州東七八里遇騎從自東來不避左右叱之乃曰
鎮州節度使石敬瑭也帝喜敬瑭拜舞于路帝下馬慟
哭諭以潞王危社稷康義誠以下叛我無以自庇長公
主見教逆爾于路謀社稷大計敬瑭曰衛州王弘贊宿
諳舊事且就弘贊圖之敬瑭即馳騎而前見弘贊曰主
上播遷至此危迫吾戚屬也何以圖全弘贊曰天子避
狄古亦有之然于奔迫之中亦有將相國寶法物所以
軍長瞻奉不覺其亡也今宰執近臣從乎寶玉法物從

乎詢之無有弘贊曰大樹將顛非一繩所維今以五十騎奔竄無將相一人擁從安能興復大計所謂蛟龍失雲雨者也今六軍將士總在潞邸矣公縱以戚藩念舊無奈之何遂與弘贊同謁于驛亭宣坐謀之敬瑭以弘贊所陳以聞弓箭庫使沙守榮奔洪進前謂敬瑭曰主上即明宗愛子公即明宗愛婿富貴既同受休戚合共之令謀于戚藩欲期安復翻索從臣國寶欲以此為辭為賊篡天子耶乃抽佩刀刺敬瑭敬瑭親將陳暉捍之

守榮與暉單戰而死洪進亦自刎是日敬塘盡誅帝之
從騎五十餘輩獨留帝於驛乃馳騎趨洛四月三日潞
王入洛五日即位七日廢帝為鄂王遣弘贊子殿直王
巒之衛州時弘贊已奉帝幸州解九日巒至帝遇鳩而
崩時年二十一是日辰時白虹貫日皇后孔氏在宮中
及王巒迴即日與其四子並遇害晉高祖即位謚曰閔
與秦王及末帝子重吉並葬於徽陵域中封纏數尺路
人觀者悲之

史臣曰閔帝爰自沖年素有令問及徵從代邸入踐堯
階屬軒皇之弓劍初遺吳王之几杖未賜遽生猜間遂
至奔亡益輔臣無安國之謀非少主有不君之咎以至
越在草莽失守宗祧斯蓋天命之難忱土德之將謝故
也

舊五代史卷四十五

舊五代史卷四十五攷證

唐閔帝紀閔帝諱從厚小字菩薩奴明宗第三子也○

案歐陽史作明宗第五子吳鎮常辨其誤今攷五代會要亦作第三子與是書同

十二月癸卯朔○案五代春秋作癸亥朔蓋傳寫之訛歐陽史通鑑俱從是書作癸卯

節度使符彥超為部曲王希全所害○案彥超被害通鑑從是書作閏月五代春秋繫于正月殊誤

丁酉王思同加同平章事充西面行營都部署以前邠
州節度使藥彥稠為副部署○案歐陽史辛卯西京
留守王思同為西面行營都部署靜難軍節度使藥
彥稠為副是書作丁酉與歐陽史異據通鑑則思同
以辛卯充都部署丁酉加同平章也蓋採薛歐二史
而兼用之

殿直楚匡祚上言○楚匡祚原本作楚祚今從通鑑增

匡字

陝州奏潞王至潼關害西面都部署王思同○歐陽史
作思同奔歸于京師死之與是書異

是夜帝以百騎出玄武門○案契丹國志愍帝領五十
騎自隨出奔衛州宋史李洪信傳又作少帝東奔捧
聖軍數百騎從行與是書異據下文王弘贊曰今以
五十騎奔竄則作五十騎者是也

九日巒至帝遇酈而崩○案契丹國志云王巒至衛州
進酈于愍帝愍帝不飲巒縊殺之與是書異

欽定四庫全書舊要卷五千四百四十七

舊五代史卷四十六

宋門下侍郎參知政事監修國史薛居正等撰

唐書第二十二

末帝紀上

末帝諱從珂本姓王氏鎮州人也母宣憲皇后魏氏以光啟元年歲在己巳正月二十三日生帝于平山景福中明宗為武皇騎將畧地至平山遇魏氏據之帝時年

十餘歲明宗養為己子小字二十三帝幼謹重寡言及壯長七尺餘方頤大體材貌雄偉以驍果稱明宗甚愛之在太原嘗與石敬瑭因擊毬同入于趙襄子之廟見其塑像屹然起立帝秘之私心自負及從明宗征討以力戰知名莊宗嘗曰阿三不惟與我同齒敢戰亦相類莊宗與梁軍戰于胡柳陂兩軍俱撓帝衛莊宗奪土山摧驍陣其軍復振時明宗先渡河莊宗不悅謂明宗曰公當為吾死渡河安往明宗待罪莊宗以帝從戰有功

由是解溫天祐十八年莊宗營于河上議討鎮州留守
符存審在德勝砦未行梁人謂莊宗已北乃悉衆攻德
勝莊宗命明宗存審為兩翼以抗之自以中軍前進梁
軍退卻帝以十數騎雜梁軍而退至壘門大呼斬首數
級斧其望櫓而還莊宗大噱曰壯哉阿三賜酒一器同
光元年四月從明宗襲破鄆州九月莊宗敗梁將王彥
章于中都急趨汴州明宗將前軍帝率勁騎以從晝夜
兼行率先下汴城莊宗勞明宗曰復唐社稷卿父子之

功也二年以帝為衛州刺史時有王安節者昭宗朝相
杜讓能之宅吏也安節少善賈得相術于奇士因事見
帝于私邸退謂人曰真北方天王相也位當為天子終
則我莫知也三年明宗奉詔北禦契丹以家在太原表
帝為北京內衛指揮使莊宗不悅以帝為突騎都指揮
使遣戍石州四年魏州軍亂明宗赴洛時帝在橫水率
部下軍士由曲陽孟縣趨常山與王建立會倍道兼行
渡河而南由是明宗軍聲大振天成初以帝為河中節

度使明年二月加檢校太保同平章事十一月加檢校
太傅長興元年加檢校太尉先是帝與樞密使安重誨
在常山因杯盤失意帝以拳擊重誨腦中其櫛走而獲
免帝雖悔謝然重誨終銜之及帝鎮河中重誨知其出
入不時因矯宣中旨令牙將楊彥溫邁出郭則閉門勿
納是歲四月五日帝閱馬于黃龍莊彥溫閉城拒帝帝
聞難遽還遣問其故彥溫曰但請相公入朝此城不可
入也帝止虞鄉以聞明宗詔帝歸闕遣藥彥稠將兵討

彥溫令生致之面要鞫問十一月收城彥溫已死明宗以彥稠不能生致彥溫甚怒之後數日安重誨以帝失守諷宰相論奏行法明宗不悅重誨又自論奏明宗曰朕為小將校時家徒衣食不足賴此兒荷石灰收馬糞存養以至于今貴為天子而不能庇一兒卿欲行朝典朕未曉其義卿等可速退從他私第間坐遂詔歸清化里第不預朝請帝尚懼重誨多方危陷但日諷佛書陰禱而已二年安重誨得罪帝即授左衛大將軍未幾復檢

校太傅同平章事行京兆尹充西京留守三年進位太尉移鳳翔節度使四年五月封潞王閔帝即位加兼侍中既而帝子重吉出刺亳州女尼入宮帝方憂不測應順元年二月移帝鎮太原是時不降制書惟以宣授而已帝聞之召賓佐將吏以謀之皆曰主上年幼未親庶事軍國大政悉委朱弘昭等王必無保全之理判官馬涓孫曰君命名不俟駕行焉諸君凶言非令圖也是夜帝令李專美草檄求援諸道欲誅君側之罪朝廷命王

思同率師來討三月十五日外兵大集

九國志李彥琦傳潞王守岐下

諸道將急攻其壘彥琦時在圍中罄家財以給軍用

十六日大將督衆攻城帝登

城垂泣諭于外曰我年未二十從先帝征伐出生入死

金瘡滿身樹立得社稷軍士從我登陣者多矣今朝廷

信任賊臣殘害骨肉且我有何罪因慟哭聞者哀之時

羽林都指揮使楊思權謂衆曰大相公吾主也遂引軍

自西門入嚴衛都指揮使尹暉亦引軍自東門而入外

軍悉潰十七日率居民家財以賞軍士是日帝整衆而

東二十日次長安副留守劉遂雍以城降率京兆居民
家財犒軍二十三日次靈口誅王思同二十四日次華
州收藥彥稠繫獄二十五日次閔鄉王仲臯父子迎謁
命誅之二十六日次靈寶河中節度使安彥威來降待
罪宥之遣歸鎮陝州節度使康思立奉迎二十七日次
陝州下令告諭京城二十八日康義誠軍前兵士相繼
來降義誠詣軍門請罪帝宥之駕下諸軍畢至誅宣徽
南院使孟漢瓊于路左是夜閔帝與帳下親騎百餘出

玄武門而去夏四月壬申帝至蔣橋文武百官立班奉
迎教旨以未拜梓宮未可相見俟會于至德宮時六軍
勦臣及節將內職已累表勸進是日帝入謁太后太妃
至西宮伏梓宮慟哭宰相與百寮班見致拜帝答拜馮
道等上牋勸進帝立謂羣臣曰子之此行事非獲已當
俟主上歸闕園陵禮終退守藩服諸公言遽及此信無
謂也衛州刺史王弘贊奏閔帝以前月二十九日至州
癸酉皇太后下令降閔帝為鄂王又太后令曰先皇帝

誕膺天眷光紹帝圖明誠動于三靈德澤被于四海方
期偃草遽歎遺弓自少主之承祧為奸臣之擅命離間
骨肉猜忌磐維既輒易於藩垣復驟興于兵甲遂致輕
離社稷大撓軍民萬世鴻基將墜于地皇長子潞王從
珂位居冢嗣德茂沖年乃武乃文惟忠惟孝前朝廊清
多難有戰伐之大功纘紹丕圖有夾輔之盛業今以宗
祧乏祀園寢有期須委親賢俾居監撫免萬機之壅滯
慰兆庶之推崇可起今月四日知軍國事權以書詔印

施行是日監國在至德宮宰臣馮道等率百官班于宮門待罪帝出于庭曰相公諸人何罪請復位乃退甲戌太后令曰先皇帝擲風沐雨平定華裔嗣洪業于艱難致蒼生于富庶鄂王嗣位奸臣弄權作福作威不誠不信離間骨肉猜忌磐維鄂王輕捨宗祧不克負荷洪基大寶危若綴旒須立長君以紹丕構皇長子潞王從珂日躋孝敬天縱聰明有神武之英姿有寬仁之偉畧先朝經綸草昧廓靜寰區辛勤有百戰之勞忠貞贊一統

之運臣誠子道冠古超今而又克已化民推心撫士率
土之謳歌有屬上蒼之睞命攸臨一日萬幾不可以暫
曠九州四海不可以無歸況因山有期同軌斯至永言
嗣守屬任元良宜即皇帝位乙亥監國赴西宮柩前告
奠即位攝中書令李愚宣冊書曰維應順元年歲次甲
午四月庚午朔六日乙亥文武百寮特進守司空兼門
下侍郎同中書門下平章事充太微宮使弘文館大學
士上柱國始平郡公食邑二千五百戶臣馮道等九千

五百九十三人上言帝王興運天地同符河出圖而洛
出書雲從龍而風從虎莫不恢張八表覆育兆民立大
定之基保無疆之祚人謠再洽天命顯歸須登宸極之
尊以奉祖宗之祀伏惟皇帝陛下天資仁智神助機權
奉莊宗于多難之時從先帝于四征之際凡當決勝無
不成功洎正皇綱每嚴師律為國家之志大守臣子之
道全自泣遺弓常悲易月欲期同軌親赴因山而自鄂
王承祧奸臣擅命致神祇之乏饗激朝野以歸心使屈

者仲令否者奉人情大順天象至明聚東井以呈祥拱
北辰而應運由是文武百辟岳牧羣賢至于比屋之倫
盡祝當陽之位今則承太后慈旨守先朝遠圖撫四海
九州享千齡萬祀臣等不勝大願謹上寶冊稟太后令
奉皇帝踐祚臣等誠慶誠忭謹言帝就殿之東楹受羣
臣稱賀先是帝在鳳翔日有瞽者張濛自言知術數事
太白山神其神祠即元魏時崔浩廟也時之否奉人之
休咎濛告于神即傳吉凶之言帝親校房嵩酷信之一

日濛至府聞帝語聲駭然曰非人臣也嵩詢其事即傳
神語曰三珠併一珠驢馬沒人驅歲月甲庚午中興戊
己土嵩請解釋曰神言予不知也長興四年五月府解
諸門無故自動人頗駭異遣嵩問濛濛曰衙署小異勿
怪不出三日當有恩命是夜報至封潞王及帝移鎮河
東甚懼問濛濛曰王保無患王思同兵至又詰之濛曰
王有天下不能獨力朝廷兵來迎王也王若疑臣臣惟
一子請王致之麾下以質臣心帝乃以濛攝館驛巡官

至是帝受冊冊曰維應順元年歲次甲午四月庚午朔
帝迴視房嵩曰張濛神言甲庚午不亦異乎帝令嵩共
術士解三珠一珠事言三珠三帝也驢馬沒人驅失位
也帝即位之後以濛為將作少監同正仍賜金紫以酬
之帝初封潞王言事者云潞字一足已入洛矣又帝在
鳳翔日有何叟者年踰七十暴卒見陰官凭几告叟曰
為我言于潞王來年三月當為天子二十三年叟既蘇
懼不敢言逾月復卒陰官見而叱之曰安得違吾旨不

達其事再放汝還退見廊廡下簿書以問主者曰朝代
將易此即升降人爵之籍也及蘇詣帝親校劉延朗告
之帝召而問之叟曰請質之此言無徵戮之可也後人
云二十三蓋帝之小字也又石壕人胡杲通善天文帝
召問之曰王貴不可言若舉勳宜以乙未年及舉兵又
問之杲通曰今歲蔀首王者不宜建功立事若俟來歲
入朝則福祚永遠矣其後皆驗夫如是則大寶之位必
有冥數可輕道哉丙子詔河南府率京城居民之財以

助賞軍丁丑又詔預借居民五箇月房課不問士庶一
概施行帝素輕財好施自岐下為諸軍推戴告軍士曰
候入洛人賞百千至是以府藏空匱于是有配率之令
京城庶士自絕者相繼已卯衛州奏此月九日鄂王薨
庚辰以宰臣劉昫判三司辛巳邢州奏磁州刺史宋令
詢自經而卒令詢鄂王在藩時都押牙也故至于是甲
申帝以鄂王薨行服于內園羣臣奉慰癸未太后太妃
出宮中衣服器用以助賞軍乙酉帝服袞冕御明堂殿

文武百寮朝服就位宣制改應順元年為清泰元年大赦天下常赦不原者咸赦除之丁亥以宣徽北院使郝瓊為宣徽南院使權判樞密院以前三司使王玫為宣徽北院使以隨駕牙將宋審虔為皇城使劉廷朗為莊宅使鳳翔節度判官韓昭胤為左諫議大夫充端明殿學士觀察判官馬胤孫為翰林學士掌書記李專美為樞密院直學士戊子侍衛親軍都指揮使康誠義伏誅是日詔曰樞密使朱弘昭馮贊宣徽南院使孟漢瓊西

京留守王思同前邠州節度使藥彥稠共相朋煽妄舉
干戈互興離間之謀幾構傾亡之禍宜行顯戮以快羣
情仍削奪官爵云庚寅鳳翔奏西川孟知祥僭稱大蜀
年號明德有司上言皇帝以五月朔日御明堂殿受朝
三日夏至祀皇地祇前二日奏告獻祖室不坐比正旦
冬至是日有祀事則次日受朝今祀在五鼓前質明行
禮畢御殿在旦後請比例行之詔曰日出御殿舉祀事
無妨宜依常年例史館奏凡書詔及處分公事臣下奏

議望令近臣錄付當館詔端明殿學士韓昭肩樞密直

學士李專美錄送辛卯以左諫議大夫盧損為右散騎

常侍壬辰詔賜禁軍及鳳翔城下歸明將校錢帛各有

差

通鑑云禁軍在鳳翔歸命者自楊思權尹暉等各賜二馬一駝錢七十緡下至軍人錢二十緡其在京者

緡各十初帝離岐下諸軍皆望以不次之賞及從至京師

不滿所望相與謠曰去卻生菩薩扶起一條鐵其無厭

如此丙申葬明宗皇帝于徽陵丁酉奉神主于太廟戊

戌山陵使司空兼門下侍郎平章事馮道上表納政不

允五月庚子朔御文明殿受朝賀乙巳以左龍武指揮
使安審琦為左右捧聖都指揮使以右千牛上將軍符
彥饒為左右嚴衛都指揮使丙午以端明殿學士韓昭
胤為樞密使以莊宅使劉廷朗為樞密副使以權知樞
密事房嵩為宣徽北院使以成德軍節度使大同彰國
振武威塞等軍蕃漢馬步都部署檢校太尉兼侍中駙
馬都尉石敬瑭為北京留守河東節度使加檢校太師
兼中書令都部署如故汴州節度使檢校太師兼侍中

駙馬都尉趙延壽進封魯國公戊申中書門下奏太常

禮院狀明宗以此月二十日祔廟宰臣攝太尉行事緣

馮道在假李愚十八日私忌在致齋內劉昫又奏判三

司免祀事

五代會要清泰元年五月宰臣劉昫奏中書以近勅祠祭行事官致齋內唯祀事得行其

餘悉斷又宰臣行事致齋內不押班不赴內殿起居不知印臣緣判三司公事其祀事國忌行香伏乞特免從

之詔禮官參酌有司上言李愚私忌在致齋內諸私忌

日遇大朝會入閣宣召皆赴朝參今祔廟事大忌日屬

私請比大朝會宣召例從之以陝府節度使康思立為

邢州節度使以同州節度使安重霸為西京留守以羽
林右第一軍都指揮使春州刺史楊思權為邠州節度
使己酉左監門衛將軍孔知鄴右驍衛將軍華光裔竝
勒停見任時差知鄆應州告廟稱疾辭命改差光裔復
稱馬墜傷足故俱罷之庚戌以司空兼門下侍郎平章
事馮道為檢校太尉同平章事充同州節度使以天雄
軍節度使范延光為樞密使封齊國公鄆州節度使李
從曠為鳳翔節度使辛亥以嚴衛都指揮使尹暉為齊

州防禦使甲寅以侍衛馬軍都指揮順化軍節度使安
從進為河陽節度使典軍如故太常卿盧文紀奏明宗
一室酌獻舞曲請名雍熙之舞從之丁巳以皇子銀青
光祿大夫檢校工部尚書重美為檢校司徒守左衛上
將軍自是諸道節度使刺史文武臣寮相繼加檢校官
或階爵封邑以帝登位覃慶也戊午以龍州防禦使相
里金為陝州節度使初帝以檄書告藩隣惟金遣判官
薛文遇往來計事故以節鎮獎之宣徽北院使檢校工

部尚書房嵩加檢校司空行左威衛大將軍使如故以
樞密使左諫議大夫韓昭眉為刑部尚書使如故已未
太白晝見以樞密副使劉延朗為左領軍大將軍職如
故庚申左僕射門下侍郎平章事監修國史李愚加特
進充太徵宮使弘文館大學士餘如故中書侍郎兼吏
部尚書同平章事集賢院大學士判三司劉昫加門下
侍郎兼吏部尚書平章事監修國史判三司癸亥秦州
奏西川孟知祥出軍迫陷成州以宣徽南院使右驍衛大

將軍郝瓊為左驍衛上將軍職如故以前義州刺史張

承祐為武勝軍畱後戊辰以前右龍武統軍王景戡為

右驍衛上將軍六月庚午朔改侍衛捧聖軍為彰聖改

嚴衛軍為寧衛壬申封吳岳成德公為靈應王禮秩同

五岳帝初起遣使祭岳以求祐及登祚故有是報五代會要

會要

載中書門下奏天寶十載正月封吳山為成德公與沂

山會稽醫巫閭

同封至德二載十二月改吳山為岳祠

享官屬一同五岳今國家以祈禱靈應宣示殊禮臣等商量請加封為靈應王從之

幽州節度使

趙德鈞進封北平王青州節度使房知溫進封東平王

癸酉以前鄆州節度使索自通為右龍武統軍甲戌皇
子左衛上將軍重美加檢校太保同平章事充鎮州節
度使兼河南尹判六軍諸衛事丁丑詔天下見禁罪人
委所在長吏躬親慮問疾速疏決庚辰幸至德宮因幸
房知溫安元信范延光索自通李從敏第壬午以檢校
太子太傅致仕王建立為檢校太尉兼侍中鄆州節度
使以前宋州節度使安元信為檢校太尉兼侍中潞州
節度使癸未三司使劉昫奏天下戶民自天成二年括

定秋夏田稅迄今八年近者相次有百姓詣闕訴田不均累行蠲放漸失稅額望差朝臣一概檢視不報甲申帝為故皇子亳州刺史重吉皇長女尼惠明大師幼澄舉哀行服羣臣詣閣門奉慰帝起兵之始重吉幼澄俱為閔帝所害乙酉以戶部侍郎韓彥惲為絳州刺史以左武衛上將軍李肅為單州刺史丙戌襄州節度使趙在禮加同平章事甲午以武勝軍畱後張承遷為華州節度使以皇城使宋審虔為壽州節度使充侍衛步軍

都指揮使以右衛上將軍劉仲殷為宋州節度使以侍
衛步軍都指揮使壽州節度使皇甫遇為鄧州節度使
以前華州節度使華溫琪為太子太傅致仕丁酉左神
武統軍周知裕卒贈太傅是月京師大旱熱甚渴死者
百餘人秋七月庚子太子少保致仕崔沂卒癸卯鳳翔
進偽蜀孟知祥來書稱大蜀皇帝獻書于大唐皇帝且
言見迫羣情以今年四月十二日即皇帝位云帝不答
以前武州刺史鄭琮為右衛上將軍甲辰幸龍門佛寺

禱雨乙巳皇子故亳州團練使重吉贈太尉仍于宋州
置廟丁未鳳翔節度使李從曠封西平王是日宰臣李
愚劉昫因論公事于政事堂相詬辭甚鄙惡帝令樞密
副使劉延朗宣諭曰卿等輔弼之臣不宜如是今後不
得更然辛亥以太常卿盧文紀為中書侍郎平章事是
日中書門下三上章請立中宮從之丁巳制立沛國夫
人劉氏為皇后庚申太子少傅陳臯卒乙丑史官張昭
遠以所撰莊宗朝列傳三十卷上之八月庚午詔蠲放

長興四年十二月以前天下所欠錢稅辛未以前尚書
左丞姚顥為中書侍郎平章事詔應曾受御署官遂攝

同一任正官依期限赴選

徐無黨五代史注云御署官疑是廢帝初舉兵時所置之

官以其非吏部正授故須有旨方得選

荆南奏偽蜀孟知祥卒其子昶嗣

偽位壬申以尚書禮部侍郎鄭韜光為刑部侍郎以前

工部侍郎楊凝式為禮部侍郎甲戌以前金州防禦使婁

繼英為右神武統軍以右神武統軍高允貞為左神武

統軍乙亥以翰林學士承旨工部尚書知制誥李惲為

太常卿以翰林學士戶部侍郎知制誥程邈為學士承
旨甲申以兵部侍郎龍敏為吏部侍郎以秘書監崔居
儉為工部尚書乙酉以右武衛上將軍張繼祚為右衛
上將軍以右驍衛上將軍王景戡為左衛上將軍以右
領衛上將軍劉衛為左武衛上將軍以右千牛上將軍
王陟為右領軍上將軍以司農卿通事舍人兼判四方
館事王景崇為鴻臚卿依前通事舍人判四方館丁亥
右龍武統軍索自通卒辛卯禮部尚書致仕李光憲卒

甲午以太子少傅盧質為太子少師乙未以前邢州節
度使趙鳳為太子太保詔文武百官差使宜令依倫次
中書置簿不得重疊若當使者自緣有事或不欲行者
注簿便當一使自長興三年正月後已曾奉使者便為
簿首已後差者次第注之有司上言皇后受冊内外命
婦上牋無答教從之丙申御文明殿冊皇后命使攝太
尉宰臣盧文紀使副攝司徒右諫議大夫盧損詣皇后
宮行禮畢恩賜有差九月己亥以久雨分命朝臣營都

城門告宗廟社稷辛丑夜有星如五瓣器西南流尾迹
長數丈屈曲如龍形又衆星亂流不可勝數京師大雨
雹如彈丸曹州刺史藥縱之卒甲辰以霖霪甚詔都下
諸獄委御史臺憲錄問諸州縣差判官令錄親自錄問
畫時疏理壬子中書門下舉行長興三年勅常年薦送
舉人州郡行鄉飲酒之禮帖太常草定儀注奏聞甲寅
以前潞州節度使檢校太尉同平章事盧文進為安州
節度使己未雲州奏契丹入境冬十月辛未有雉金色

止于中書政事堂中書門下奏請以正月二十三日皇

帝誕慶日為千春節從之戊寅宰臣李愚劉昫罷相以愚守左僕射昫守右僕射契丹入雲應州詔河東節度使石敬瑭率兵屯代州戊子宰臣姚顥奏吏部三銓近年併為一司望令依舊分銓從之辛卯以左衛上將軍李宏元卒廢朝贈司徒癸巳以禮部郎中知制誥呂琦守本官充樞密院直學士十一月辛丑以刑部侍郎鄭韜光為尚書右丞以光祿少卿烏昭遠為少府監秦州

節度使張廷朗奏率師伐蜀中書門下奏二十六日明
宗忌陛下初遇忌辰不同常歲請于忌辰前後各一日
不坐朝從之御史臺奏前任節度使刺史行軍副使雖
每日于便殿起居每遇五日起居亦合綴班從之丙午
以前興州刺史馮暉配同州衙前安置暉為興州刺史
屯乾渠蜀人來侵暉自屯所奔歸鳳翔故有是責丁未
詔振武新州河東西北邊經契丹蹂踐處放免三年兩
稅差配時契丹初退故也癸丑以前華州節度使王萬

榮為左驍衛上將軍致仕甲寅以振武節度使楊光遠
充大同彰國振武威塞等軍兵馬都虞侯以前右金吾
大將軍穆延暉為右武衛上將軍壬戌以禮部侍郎楊
凝式為戶部侍郎甲子以中書舍人盧導為禮部侍郎
十二月丁卯朔詔修奉本朝諸帝陵寢已以北面馬
軍都指揮使易州刺史安叔干為安北都護振武節度
使以齊州防禦使尹暉為彰國軍節度使庚午詔葬庶
人從榮有司上言休貞觀中庶人承乾以公禮葬從之

乙亥以秦州節度使張廷朗為中書侍郎同平章事判

三司

五代會要二年三月宰臣張廷朗奏臣判三司公事每日內殿祇候其合綴前班押班伏乞特免從

之以中書侍郎平章事盧文紀為門下侍郎平章事監

修國史以中書侍郎平章事姚顥兼集賢殿大學士以

前邠州節度使康福為秦州節度使丙戌夜有白氣東

西亘天庚寅幸龍門祈雪自九月至是無雨雪故也

舊五代史卷四十六攷證

唐末帝紀上末帝諱從珂本姓王氏鎮州人也母宣憲
皇后魏氏以光啟元年歲在己巳正月二十三日生
帝于平山景福中明宗為武皇騎將畧地至平山遇
魏氏據之帝時年十餘歲明宗養為己子○案通鑑
考異引唐廢帝實錄云廢帝諱從珂明宗之元子也
母曰宣憲皇后魏氏鎮州平山人中和末明宗徇地
山東留戍平山得魏后帝以光啟元年正月二十三

日生于外舍屬用兵不息音問阻絕帝甫十歲方得歸宗今考五代會要歐陽史通鑑諸書皆作養子惟實錄作元子疑因太后令稱為皇長子而傳會也

二十三日次靈口○靈口通鑑唐紀作零口考冊府元龜亦作靈口今仍其舊

二十七日次陝州○案歐陽史作已巳次陝州是書閔帝紀作丁卯通鑑從是書

夏四月壬申帝至蔣橋文武百官立班奉迎○案通鑑

四月庚午朔太后令內諸司至乾塲迎潞王考異引

廢帝實錄作三月三十日

癸酉皇太后下令降閔帝為鄂王○案通鑑考異引閔

帝實錄七日廢帝為鄂王廢帝實錄作癸酉薛歐二

史從廢帝實錄

潞字一足已入洛矣○洛原本記潞今據冊府元龜改

正

甲申○案甲申疑當作壬午以下文即癸未也

欽定四庫全書

附

卷四十六 放證

欽定四庫全書

舊要卷五千四百四十八

舊五代史卷四十七

宋門下侍郎參知政事監修國史薛居正等撰

唐書第二十三

末帝紀中

清泰二年春正月丙申朔帝御明堂殿受朝賀仗衛如
式乙巳中書門下奏遇千春節凡刑獄公事奏覆候次
月施行今後請重繫者即候次月輕繫者即節前奏覆

決遣從之戊申宗正寺奏北京應州曹州諸陵望差本
州府長官朝拜五代會要載宗正寺原奏云北京永興
長寧建極三陵應州遂行更三陵准曹
州溫陵例下本
州府官朝拜雍坤和徽四陵差太常宗正卿朝拜從
之己酉北京奏光祿卿致仕周玄豹卒庚申鄆都進天
王甲帝在藩時有相士言帝如毗沙天王帝知之竊喜
及即位選軍士之魁偉者被以天王甲俾居宿衛因詔
諸道造此甲而進之三司奏派徵釐鹽錢及增麴價先
是麴斤八十文增至一百五十文乙丑雲州節度使張

溫移鎮晉州以西京留守安重霸為雲州節度使二月
庚午定州節度使王從溫移鎮兗州振武軍節度使楊
檀移鎮定州兼北面行營馬步都虞候甲戌以定州節
度使李周為京兆尹充西京留守以樞密使天雄軍節
度使范延光為檢校太師兼中書令充汴州節度使皇
子鎮州節度使兼河南尹判六軍諸衛事左右衛坊使
重美加檢校太尉同平章事充天雄軍節度使餘如故
辛巳以右諫議大夫盧損為御史中丞以御史中丞張

鵬為刑部侍郎壬午寧遠軍節度使馬存加兼侍中鎮
南軍節度使馬希振加兼中書令詔順義軍節度使姚
彥章加兼侍中己丑宰臣盧文紀等上皇妣魯國太夫
人尊謚曰宣憲皇太后請擇日冊命從之三月戊戌故
太子太保趙鳳贈太傅辛丑以前汴州節度使趙延壽
為許州節度使兼樞密使以夏州行軍司馬李彞殷為
本州節度使兄彞超卒故也癸卯以靜海軍節度使檢
校太師兼中書令安南都護錢元鏗為留守太保餘如

故丙午以給事中趙光輔為右散騎常侍戊申皇妹魏國夫人石氏封晉國長公主齊國公主趙氏封燕國長公主己酉有司上言宣憲皇后未及山陵權于舊陵所建廟從之辛亥功德使奏每年誕節諸州府奏薦僧道其僧尼欲立講論科講經科表白科文章應制科持念科禪科聲贊科道士欲立經法科講論科文章應制科表白科聲贊科焚修科以試其能否從之丙辰以右龍武統軍李德珫為涇州節度使庚申以鎮州節度使知

軍府事董溫琪為鎮州節度使檢校太保壬戌以左右
彰聖都指揮使富州刺史安審琦領楚州順化軍節度
使軍職如故審琦受閔帝命西征至鳳翔而降故有是
命是月太常丞史在德上疏言事其畧曰朝廷任人率
多濫進稱武士者不聞計策雖被堅執銳戰則棄甲窮
則背軍稱文士者鮮有藝能多無士行問策謀則杜口
作文字則倩人所謂虛設具員枉耗國力逢陞下惟新
之運是文明革弊之秋臣請應內外所管軍人凡勝衣

甲者請宣下本部大將一一考試武藝短長權謀深淺
居下位有將才者便拔為大將居上位無將略者移之
下軍其東班臣僚請內出策題下中書令宰臣面試如
下位有大才者便拔居大位處大位無大才者即移之
下僚其疏大約如此盧文紀等見其奏不悅班行亦多
憤悱故諫官劉濤楊昭儉等上疏請出在德疏辨可否
宣行中書覆奏亦駁其錯誤帝詔學士馬涓孫謂曰史
在德語太凶其實難容朕初臨天下須開言路若朝士

以言獲罪誰敢言者爾代朕作詔勿加在德之罪詔曰
左補闕劉濤等奏太常丞史在德所上章疏中書門下
駁奏未奉宣諭乞特施行分明顯朕嘗覽貞觀故事
見太宗之治理以貞觀昇平之運太宗明聖之君野無
遺賢朝無闕政盡善盡美無得而名而陝縣丞皇甫德
參輒上封章恣行訕謗人臣無禮罪不容誅賴文貞之
彌縫恕德參之狂瞽魏徵奏太宗曰陛下思聞得失只
可恣其所陳若所言不中亦何損于國家朕每思之誠

要言也遂得下情上達德盛業隆太宗之道彌光文貞
之節斯著朕惟寡昧獲奉宗祧業業兢兢懼不克荷思
欲率循古道簡拔時材懷忠抱直之人虛心渴見便佞
詭隨之說杜耳惡聞史在德近所獻陳誠無避忌中書
以文字紕繆比類僭差改易人名觸犯廟諱請歸憲法
以示戒懲蓋以中書既委參詳合盡事理朕纘承前緒
誘勸將來多言數窮雖聖祖之所戒千慮一得冀愚者
之可從因覽文貞之言遂寬在德之罪已今停寢不遣

宣行劉清等官列諫垣宜陳讜議請定短長之理以行
黜陟之文昔魏徵則請賞德參今濤等請黜在德事同
言異何相遠哉將議允俞恐虧開納方朝廷粗理俊乂
畢臻留一在德不足為多去一在德未足為少苟可懲
勸朕何憂焉但緣情在傾輸理難黜責濤等敷奏朕亦
優容宜體含弘勉思竭盡凡百在下悉聽朕言夏四月
辛巳宰臣判三司張延朗秦州縣官徵科條格其令錄
在任徵科依限了絕一年加階兩年與試銜三年皆及

限了絕與服色攝任者一年內了絕及攝二年三年內
皆及限與真命其主簿同縣令條本判官一年加階二
年改試銜三年轉官本曹官省限內了絕與試銜諸節
級三年內並了絕者與賞錢三十貫其責罰依天成四
年五月五日勅施行從之癸未御史中丞盧損等進清
泰元年以前十一年制勅堪悠久施行者三百九十四
道編為三十卷其不中選者各令所司封閉不得行用
詔其新編勅如可施行付御史臺頒行以宰相盧文紀

兼太微宮使弘文館大學士姚顥加門下侍郎監修國史張延朗兼集賢殿大學士以樞密使韓昭眉為中書侍郎兼兵部尚書平章事乙酉以前武勝軍節度使張萬進為鄜州節度使辛卯以宣徽南院使劉延皓為刑部尚書充樞密使以司天監耿瑗為太府卿以偽蜀右衛上將軍胡杲通為司天監以宣徽北院使房嵩為左衛上將軍充宣徽南院使以樞密副使劉延朗為左領軍上將軍充宣徽北院使兼樞密副使五月丙申新州

振武奏契丹入境乙巳詔天下見禁囚徒自五月十二日以前除十惡五逆放火燒舍持杖殺人官典犯賊僞行印信合造毒藥并見欠省錢外罪無輕重一切釋放庚戌詔不得貢奉寶裝龍鳳雕鏤刺作組織之物中書奏準勅凡廟諱但迴避正文其偏旁文字不在減少點畫今定州節度使楊檀檀州金壇等名酌情制宜並請改之其表章文案偏旁字闕點畫凡臣僚名涉偏旁亦請改名詔曰偏旁文字音韻懸殊止避正呼不宜全改楊

檀賜名光遠餘依舊甲寅以戶部侍郎楊凝式為秘書
監以尚書禮部侍郎盧導為尚書右丞以尚書右丞鄭
韜光為尚書左丞丙辰以端明殿學士李導姜為兵部
侍郎以端明殿學士李崧為戶部侍郎以翰林學士馬涓
孫為禮部侍郎以禮部郎中充樞密院直學士呂琦
為給事中並充職如故太子少保致仕任圜贈尚書右
僕射以順化軍節度使兼彰聖都指揮使北面行營排
陣使安審琦為邢州節度使庚申以兵部尚書李鏘為

太常卿以禮部尚書王權為戶部尚書以太常卿李憚
為禮部尚書癸亥以六軍諸衛判官給事中張允為右
散騎常侍六月甲子朔新州上言契丹入境乙丑有司
上言宣憲皇太后陵請以順從為名從之振武奏契丹
二萬騎在黑榆林丁卯以太子少保致仕朱漢賓卒廢
朝壬申命史官修撰明宗實錄契丹入應州以新州節
度使楊漢賓為同州節度使以前晉州節度使翟璋為
新州節度使庚辰北面招討使趙德鈞奏行營馬步軍

都虞候定州節度使楊光遠行營排陣使邢州節度使安審琦帥本軍至易州見進軍追襲契丹次河東節度使石敬瑭奏邊軍乏芻糧其妄重榮巡邊兵士欲移振武就糧從之尋又奏懷孟租稅請指揮于忻代州輸納朝廷以邊儲不給詔河東戶民積粟處量事抄借仍于鎮州支絹五萬匹送河東充博采之直是月北面轉運副使劉福配鎮州百姓車子一千五百乘運糧至代州時水旱民饑河北諸州困于飛輓逃潰者甚衆軍前使

者繼至督促糧運由是生靈咨怨卒已詔諸州府署醫
博士丙戌以前許州節度使李從昶為右龍武統軍以
前彰國軍節度使沙彥珣為右神武統軍秋七月丙申
石敬瑭奏斬挾馬都指揮使李暉等三十六人以謀亂
故也時敬瑭以兵屯忻州一日軍士喧譟遽呼萬歲乃
斬暉等以止之

契丹國志契丹屢攻北邊時石敬瑭將大兵屯忻州潞王遣使賜軍士夏衣傳詔撫諭軍士呼萬歲者數四輩塘懼幕僚段希堯請誅其倡者敬瑭命劉知遠斬三十六人以殉潞王間益疑

之御史中丞盧損奏準天成二年七月勅每月首十五

日入閣罷五日起居臣以為中旬排仗有勞聖躬請只
以月首入閣五日起居依舊又準天成三年五月長興
二年七月勑許諸州節度使帶使相歲薦寮屬五人餘
薦三人防禦團練使薦二人今乞行釐革又長興二年
八月勅州縣佐官差充馬步判官仍同一任乞行止絕
依舊衙前選補詔曰今後藩臣帶使相許薦三人餘薦
二人直屬京防禦團練使薦一人餘並從之丁酉迴紇
可汗仁美遣使貢方物西京弓弩指揮使任漢權奏六

月二十一日與川軍戰于金州之漢陰王師不利其部
下兵士除傷痍外已至鳳翔先是盩厔鎮將劉蕡引軍
入川界為蜀將全師郁所敗金州都監崔處訥重傷諸
州屯兵潰散金州防禦使馬全節收合州兵固守獲全
以樞密使劉廷皓為天雄軍節度使甲辰以右神武統
軍沙彥珣權知雲州乙巳以徐州節度使張敬達充北
面行營副總管時契丹入邊石敬瑭屢請益兵朝廷軍
士多在北鄙俄間忻州諸軍呼譟帝不悅乃命敬達為

北軍之副以減敬塘之權也丁巳宰臣盧文紀等上疏
其畧曰臣近蒙召對面奉天旨凡軍國庶事利害可否
卿等合盡言者臣等謬處臺衡奉行制勅但緣事理互
有區分軍戎不在于職司錢穀非關於局分苟陳異見
即類侵官況才不濟時識非經遠因五日起居之例于
兩班旅見之時略獲對敍兼承顧問衛士周環于階陛
庶臣羅列于殿庭四面衆觀十手所指臣等苟欲各伸
愚短此時安敢敷陳韓非昔懼于說難孟子亦憂于言

責臣竊奉本朝政事肅宗初平寇難再復寰瀛頗經涉
于艱難尤勤勞于委任每正衙奏事則泛咨訪于羣臣
及便殿詢謀則獨對駁于四輔自上元年後于長安東
內置延英殿宰臣如有奏議聖旨或有特宣皆于前一
日上間對御之時祇奉冕旒旁無侍衛獻可替否得曲
盡于討論捨短從長故無虞于漏洩君臣之際情理坦
然伏望聖慈俯循故事或有事關軍國謀繫否臧未果
決于聖懷要詢訪于臣輩則請依延英故事前一日傳

宣或臣等有所聽聞切關利害難形文字須面敷敬臣等亦依故事前一日傳文延英當君臣奏議之時祇請機要臣寮侍立左右兼乞稍霽威嚴怒臣荒拙雖乏鷹鸇之効庶盡葵藿之心詔曰卿等濟代英才鎮時碩德或締攝于興王之日或經綸于贊聖之時鹽梅之任俱崇藥石之言並切請復延英之制以伸議政之規而况列聖遺芳皇朝盛事載詳徵引良切歎嘉恭惟五日起居先皇垂範俟百寮之俱退召四輔以獨昇接以溫顏

詢其理道計此時作事之意亦昔日延英之流朕叨獲
嗣承切思遵守將成其美不爽兼行其五日起居仍全
仍舊尋常公事亦可便舉奏聞或事屬機宜理當秘密
量事緊慢不限隔日及當日便可于閣門祗候具牘子
奏聞請面敷敍即當盡屏侍臣端居便殿佇間高議以
慰虛懷朕或要見卿時亦令當時宣召但能務致理之
實何必拘延英之名有事足可以討論有言足可以陳
述宜以沃心為務勿以逆耳為虧勉聲謀猷以裨寡昧

帝性仁恕聽納不倦嘗因朝會謂盧文紀等曰朕在藩時人說唐代為人主端拱而天下治蓋以外特將校內倚謀臣故端拱而事辦朕荷先朝鴻業卿等先朝舊臣每一相見除承奉外畧無社稷大計一言相救坐視朕之寡昧其如宗社何文紀等引咎致謝因奏延英故事故有是詔八月庚午滑州節度使高允範卒壬申以右衛上將軍王景戡為左衛上將軍以右神武統軍婁繼英為右衛上將軍已卯以西上閭門使行少府少監兼

通事舍人蘇繼顏為司農卿職如故辛巳以權知雲州
右神武統軍沙彥珣為雲州節度使鄆都殺人賊陳延
嗣并母妹妻等并棄市延嗣父子相承與其妹妻于諸
州郡誘人殺之而奪其財前後被殺者數百人至是事
泄而誅之癸未以前潞州行軍司馬陳玄為將作監以
玄善醫故有是命丁亥以洺州團練使李彥舜為義武
軍節度使檢校太傅太原奏蒙古部族于靈邱安置已
丑以太子少保致仕戴思遠卒廢朝庚寅以前兗州節

度使楊漢章為左神武統軍以前邢州節度使康思立
為右神武統軍潞州奏前雲州節度使安重霸卒九月
己亥以河陽節度使侍衛馬軍都指揮使安從進為襄
州節度使以襄州節度使趙在禮為宋州節度使癸卯
以忠正軍節度使侍衛步軍都指揮使宋審虔為河陽
節度使典軍如故己酉禮部貢院奏進士請夜試童子
依舊表薦重置明算道舉舉人落第後別取文解五科
試紙不用中書印用本司印並從之以宣徽南院使房

高為刑部尚書充樞密使以宣徽北院使充樞密副使
劉延朗為宣徽南院使充樞密副使丙辰以左僕射李
惠卒廢朝冬十月丁卯幸崇道宮甘泉亭已巳以左衛
上將軍李頃為左領軍上將軍北面行營總管石敬瑭奏
自代州歸鎮庚午以晉州節度使張溫卒廢朝甲戌幸
趙延壽張延朗第丁丑以端明殿學士兵部侍郎李專
美為秘書監充宣徽北院使庚寅以左諫議大夫唐汭
為左散騎常侍十一月庚子以左驍衛上將軍郝瓊又為

左金吾上將軍以光祿卿王政為太子賓客以徐州節
度使張敬達為晉州節度使依前充大同振武威塞彰
國等軍兵馬副總管丁未以秘書少監丁濟為太子詹
事乙卯以前金州防禦使馬全節為滄州留後通鑑劉廷朗欽
除金節絳州刺史羣議拂騰帝間之以為橫海留後渤海國遣使朝貢十二月戊
辰禁用鉛錢壬申以中書侍郎兼兵部尚書充樞密使
韓昭脩為檢校司空同平章事充河中節度使甲戌以
宗正少卿李延祚為將作監致仕丁丑故武安軍州節

度使累贈太傅劉建峯贈太尉從湖南之請也戊寅太常奏來年正月一日上辛祀昊天上帝于圓丘依禮大祠不朝詔曰祀事在質明前儀仗在日出後事不相妨宜依常年受朝壬午以翰林學士承旨戶部侍郎程遂為兵部侍郎翰林學士工部侍郎崔棁為戶部侍郎翰林學士中書舍人和凝為工部侍郎並依前充職乙酉以前祕書監楊凝式為兵部侍郎己丑以前同州節度使馮道為司空以尚書右僕射劉昫為左僕射以太子

少師盧質為左僕射以兵部侍郎馬縞兼國子祭酒

舊五代史卷四十七

舊五代史卷四十七攷證


唐末帝紀中枉耗國力○枉耗通鑑注引薛史作枉費
考冊府元龜亦作枉耗今仍其舊

辛卯以宣徽南院使劉延皓為刑部尚書充樞密使○
案劉延皓充樞密使歐陽史作五月與是書繫四月
異通鑑從是書

侍衛步軍都指揮使宋審虔○宋審虔原本脫虔字今
據通鑑增入

渤海國遣使朝貢○案歐陽史作九月乙卯渤海遣使者來五代會要作十二月渤海遣使列周卿等入朝貢方物俱與是書作十一月異

蘇林學士工部侍郎崔棁○崔棁原本記崔櫓今據歐陽史改正



總校官進士臣程嘉謨
校對官中書臣吳翼成
謄錄監生臣譚湘鏡

欽定四庫全書會要

史部

舊五代史卷四十八至五十三

詳校官內閣侍讀吳孫球



欽定四庫全書 舊五代史卷五千四百四十九

舊五代史卷四十八

宋門下侍郎參知政事監修國史薛居正等撰

舊書第二十四

末帝紀下

清泰三年春正月辛卯朔帝御文明殿受朝賀仗衛如式乙未百濟遣使獻方物戊戌幸龍門佛寺祈雪癸卯以給事中充樞密院直學士呂琦為端明殿學士以六

軍諸衛判官尚書工部郎中薛文遇為樞密院直學士
乙巳以上元夜京城張燈帝微行置酒于趙延壽之第
丁未皇子河南尹判六軍諸衛事重美封雍王已未以
前司農卿王彥鎔為太僕卿二月戊辰吐渾寧朔兩府
留後李可久加檢校司徒可久本姓白氏前朝賜姓庚
子監修國史姚顥史官張昭遠李祥吳承範等修撰明
宗實錄三十卷上之五代會要同修撰官中書舍人張昭遠李祥直館左拾遺吳承範左拾遺揚昭儉等各領賚有差

以大理卿竇維為光祿卿以前許州節

度判官張登為大理卿丁丑以太常卿李鑄為兵部尚書以兵部尚書梁文矩為太常卿庚辰以前鄜州節度使皇甫立為潞州節度使辛巳以前均州刺史仇暉為左威衛上將軍保順軍節度使鮑君福加檢校太尉同平章事丁亥以昭義節度使安元信卒廢朝三月庚子中書門下奏準閣門分析內外官辭見謝規例諸州判官軍將進奉到闕舊例門見門辭令後只令朝見依舊門辭新除諸道判官書記以下無例中謝並放謝放辭

得替到京無例見令後兩使判官許中謝赴任即門辭其書記以下並依舊例朝臣文五品武四品以上舊例中謝其以下無例對謝今請依天成四年正月勅凡升朝官並許中謝諸道都押衙馬步都指揮虞候鎮將諸色場院無例謝辭並進膀子放謝放辭得替到闕無例入見在京鹽麴稅官兩官巡即許中謝新除全錄並中謝次日門辭兼有口勑誠勵文武兩班所奉口祭使及告廟祠祭只正衙辭不赴內殿諸道進奏官到闕見得

假進勝子門辭從之辛丑權知福建節度使王昶奏節
度使王延鈞以去年十月十四日卒是時延鈞父子雖
僭竊于閩嶺猶稱藩於朝廷故有是奏甲辰以右神武
統軍楊漢章為彰武軍節度使丙午以翰林學士禮部
侍郎馬涓孫為中書侍郎同平章事丁巳以端明殿學
士呂琦為御史中丞案通鑑呂琦與李崧建和親契丹之策為薛文遇所沮改為御史中丞也

戊午御史中丞盧損責授右贊善大夫知雜侍
御史韋稅責授太僕寺丞侍御史魏遜責授太府寺主

簿侍御史王岳責授司農寺主簿初延州保安鎮將白文審聞兵興岐下專殺郡人趙思謙等十餘人已伏其罪復下臺追繫推鞫未竟會去年五月十二日德音除十惡五逆放火殺人外並放盧損輕易即破械釋文審帝大怒收文審誅之臺司稱奉德音釋放不得追領祇證中書誥云德音言不在追窮枝蔓無不得追領祇證六字擅改勑語大理斷以失出罪人論故有是命是月有蛇鼠鬪于師子門外鼠生而蛇死夏四月己未朔以

左衛上將軍王景戡為左神武統軍以右領軍上將軍
李頃為華清宮使戊辰以太子詹事盧演為工部尚書
致仕卒未以中書舍人史館修撰張昭遠為禮部侍郎
以前滄州節度使李金全為右領軍上將軍是月有熊
入京城搏人五月辛卯以河東節度使兼大同彰國振
武威塞等軍蕃漢馬步總管檢校太師兼中書令駙馬
都尉石敬瑭為鄆州節度使進封趙國公以河陽節度
使充侍衛馬步軍都指揮使宋審虔為河東節度使甲

午以前晉州節度使大同彰國振武威塞等軍蕃漢副
總管張敬達充西北面蕃漢馬步都部署落副總管乙
未詔諸州兩使判官畿赤令有闕取省即遺補丞博少
列官寮選擇擢任以忠正軍節度使侍衛步軍都指揮
使張彥琪為河陽節度使充侍衛馬軍都指揮使以彰
聖都指揮使饒州刺史符彥饒為忠正軍節度使充侍
衛步軍都指揮使丙申以雍王重美與汴州節度使范
延光結婚詔充王從溫主之丁酉以國子祭酒馬縞卒

廢朝戊戌昭義奏河東節度使石敬瑭叛以鴻臚卿兼
通事舍人判四方館王景崇為衛尉卿充引進使壬寅
削奪石敬瑭官爵便令張敬達進軍攻討乙卯以晉州
節度使張敬達為太原四面兵馬都部署尋改為招討
使以河陽節度使侍衛馬軍都指揮使張彥琪為太原
四面馬步軍都指揮使以邢州節度使安審琦為太原
四面馬軍都指揮使以陝州節度使相里金為太原四
面步軍都指揮使以右監門上將軍武廷翰為壕寨使

丙辰以定州節度使楊光遠為太原四面兵馬副部署
兼馬步都虞侯尋改為太原四面副招討使都虞侯如
故以前彰武軍節度使高行周為太原四面招撫兼排
陣使初帝疑河東有異志與近臣語及其事帝曰石郎
與朕近親在不疑之地流年毀譽朕心自明萬一失歡
如何和解左右皆不對翼日欲移石敬瑭于鄆州房嵩
等堅言不可司天監趙延乂亦言星辰失度尤宜安靜
由是稍緩其事會薛文遇獨宿於禁中帝召之諭以太

原之事文遇奏曰臣聞作舍於道三年不成國家利害
斷自宸旨以臣料之石敬瑭除亦叛不除亦叛不如先
事圖之帝喜曰聞卿此言豁吾憤氣先是有人言國家
明年合得一賢佐主謀平定天下帝意亦疑賢佐者屬
在文遇即令手書除目子夜下學士院草制翼日宣制
之際兩班失色居六七日敬瑭上章云明宗社稷陛下
纂承未契輿情宜推全辟許王先朝血緒養德皇闔儻
循當璧之言免負閨牆之議帝覽奏不悅手攘抵地召

馬涓孫草詔報曰父有社稷傳之於子君有禍難倚之
於親卿于鄂王故非疏遠往歲衛州之事天下皆知令
朝許王之言人誰肯信英賢立事安肯如斯云戊申張
敬達奏西北面先鋒都指揮使安審信率雄義左第二
指揮二百二十七騎並部下共五百騎剽劫百井叛入
太原又奏大軍已至太原城下詔安審信及雄義兵士
妻男並處斬家產沒官先是雄義都在伏州屯戍其指
揮使安元信謀殺伏州刺史張朗事洩戍兵自潰奔安

審信軍審信與之入太原太常奏於河南府東權立宣
憲太后寢宮從之己酉振武節度使安叔干奏西北界
巡檢使安重榮驅掠戍兵五百騎叛入太原以新授河
東節度使宋審虔為宣州節度使充侍衛馬軍都指揮
使壬子鄆都屯駐捧聖都虞候張令昭逐節度使劉延
皓據城叛翌日令昭召副使邊仁嗣已下逼令奏請節
旄六月辛酉天雄軍節度使劉延皓削奪官爵勒歸私
第癸亥以天雄軍守禦右捧聖第二軍都虞候張令昭

為檢檢司空行右千牛將軍權知天雄軍府事丙寅御
敷政殿遣工部尚書崔居儉奉宣憲皇太后寶冊於寢
宮時陵園在河東適會兵興故權於京城修奉寢宮上
謚焉已巳以西上閭門副使少府監兼通事舍人劉頎
為鴻臚卿職如故庚午詔曰時雨稍愆頗傷農稼分命
朝臣祈禱辛未工部尚書致仕許寂卒以權知魏府事
右千牛將軍張全昭為齊州防禦使以捧聖右第三指
揮使邢立為德州刺史以捧聖第五指揮使康福進為

鄭州刺史甲戌以汴州節度使范延光為天雄軍四面招討使知行府事丙子以西京留守李周為天雄軍四面副招討使兼兵馬都監詔河東將佐節度判官趙瑩以下十四人並籍沒家產秋七月戊子范延光奏領軍至鄆都攻城次己丑誅右衛上將軍石重英皇城副使石重裔皆敬瑭之子也時重英等匿於民家升中獲而誅之并族所匿之家奚首領達喇罕遣通事介老奏奚王李素姑謀叛入契丹已處斬訖達喇罕權知本部落

事辛卯沂州奏誅都指揮使石敬德并族其家敬瑭之弟也乙未以前彰武軍節度使高行周為潞州節度使充太原四面招撫排陣使以潞州節度使皇甫立為華州節度使丁酉雲州節度使沙彥珣奏此月二日夜步軍指揮使桑遷作亂以兵圍於城彥珣突圍出城就西山據雷公口三日招集兵士入城誅亂軍軍城如故辛丑以將作監丞介國公宇文頡為汝州襄城令乙巳以衛尉卿聶延祚為太子賓客戊申范延光奏此月二十

一日收復鄆都羣臣稱賀己酉以禮部侍郎張昭遠為
御史中丞以御史中丞呂琦為禮部侍郎充端明殿學
士庚戌中書奏劉延皓賓佐等帥臣既已削奪其行軍
司馬李廷筠副使邊仁嗣以下望命放歸田里奏入帝
大怒詔大理曰帥臣失守已行削奪其寮佐合當何罪
既而竟依中書所奏壬子詔范延光誅張令昭部下五
指揮及忠銳忠肅兩指揮繼范延光奏追兵遣襲張令
昭部下敗兵至邢州沙河斬首三百級并獻張令昭邢

立李貴等首級又奏獲張令昭同惡捧聖指揮使米全
以下諸指揮使都頭凡十三人並磔于府門癸丑左衛
上將軍仇暉卒洺州奏擒獲魏府作亂捧聖指揮使馬
彥柔以下五十八人邢磁州相次擒獲亂兵並送京師
彰聖指揮使張萬迪以部下五百騎叛入太原詔誅家
屬於懷州本營八月戊午契丹遣使摩哩入朝己未以
汴州節度使范延光為天雄軍節度使守太傅兼中書
令以西京留守李周為汴州節度使檢校太尉同平章

事癸亥應州奏契丹三千騎迫城詔端明殿學士呂琦
往河東忻伐諸屯戍所擣軍以左龍武大將軍袁義為
右監門上將軍以振武軍節度使安叔干充代北兵馬
都部署已雲州沙彥珣奏供奉官李讓勳送夏衣到
州縱酒凌轢軍都行劫殺兵馬都監張思殷都指揮使
黨行進其李讓勳已處斬訖張敬達奏造五龍橋攻太
原城次戊寅以鎮州節度使董溫琪充東北面副招討
使己卯洛州獻野蘭二十斤辛巳張敬達奏賊城內出

騎軍三十隊步卒三千人衝長連城高行周襲殺入壕
溺死者大半擒賊將安小喜以下百餘人甲馬一百八
十四九月甲辰張敬達奏此月十五日與契丹戰於太
原城下王師敗績時契丹王自率部族來援太原高行
周符彥卿率左右廂騎軍出鬪蕃軍引退已時後蕃軍
復成列張敬達楊光遠安審琦等陣於賊城西北倚山
橫陣諸將奮擊蕃軍屢郤至晡我騎軍將移陣蕃軍如
山而進王師大敗投兵仗相籍而死者山積是夕收合

餘衆保於晉祠南晉安寨蕃軍擊而圍之自是音聞阻絕朝廷大恐是日遣侍衛步軍都指揮使符彥饒率兵屯河陽詔范從光率兵由青山路趨榆次詔幽州趙德鈞由飛狐路出敵軍後輝州防禦使潘環合防戍軍出磁隰以援張敬達以前絳州刺史韓彥暉為太子賓客契丹王移帳於柳林乙巳詔取二十二日幸北面軍前戊申帝發京師路經徽陵帝親行謁奠夕次河陽召羣臣議進取盧文紀勸帝駐河橋庚戌樞密使趙延壽先

赴潞州辛亥幸懷州召吏部侍郎龍敏訪以機事敏勸
帝立東丹王贊華為契丹主以兵援送入蕃則契丹王
有後顧之患不能久駐漢地矣帝深以為然竟不行其
謀遼史義宗傳云倍雖在異國常思其親問安之使不
謀絕後明宗養子從珂弑其君自立倍密報太宗曰從
珂弑君盍討之是東丹王實啟兵端唐君臣或知其陰謀故龍敏之說不行帝自是酣飲悲
歌形神慘沮臣下勸其親征則曰卿輩勿說石郎使我
心膽墮地其怯僥也如此冬十月丁巳夜彗星出虛危
長尺餘壬戌詔天下括馬又詔民十戶出兵一人罷甲

自備

契丹國志唐發民為兵每七戶出征夫一人自備
鎧仗謂之義軍凡得馬二千餘匹征夫五千人

間大擾

戊辰代州刺史張朗超授檢校太保以其屢殺敵

衆故以是命獎之癸酉幽州趙德鈞以本軍三千騎與
鎮州董溫琪由吳兒谷趨潞州十一月戊子以趙德鈞
為諸道行營都統以趙延壽為河東道南面行營招討
使以劉廷朗副之庚寅以范延光為河東道東南面行
營招討使以李周副之帝以呂琦嘗佐幽州幕乃命貴
都統官告以賜德鈞兼犒軍士琦至從容宣帝委任之

意德鈞曰既以兵相委焉敢惜死德鈞志在併范延光
軍奏請與延光會合帝以詔諭延光延光不從丁酉延
州上言節度使楊漢章為部衆所殺以前坊州刺史劉
景嚴為延州留後庚子趙德鈞奏大軍至團柏谷前鋒
殺蕃軍五百騎范延光奏軍至榆次蕃軍退入河東川
界潘環奏隰州遂退蕃軍壬寅趙德鈞奏軍出谷口蕃
軍漸退契丹王見駐柳林砦時德鈞累奏乞授延壽鎮
州節制帝怒曰德鈞父子堅要鎮州苟能遂退蕃戎要

代予位亦甘心矣若覩寇要君但恐大免俱斃德鈞聞
之不悅閏月丙辰日南至羣臣稱賀于行宮帝曰晉安
寨內將士應思家國矣因泣下久之丁巳以岢嵐軍為
勝州辛酉以右龍武統軍李從昶為左龍武統軍以前
鄆州節度使楊思權為右龍武統軍壬戌丹州刺史康
承詢停任配流鄆州時承詢奉詔率義軍赴延州義軍
亂承詢奔鄜州故有是責甲子太原行營副招討使楊
光遠殺招討使張敬達于晉安寨以兵降契丹時契丹

圍寨自十一月以後芻糧乏絕軍士毀居屋茅淘馬糞
削松木以供餚飼馬尾鬚相食俱盡楊光遠謂敬達曰
少時人馬俱盡不如奮命血戰十得三四猶勝坐受其
殃敬達曰更少待之一日光遠伺敬達無備遂殺之與
諸將同降契丹時馬猶有五千匹戎王並以漢軍與石
敬瑭其馬及甲仗即賚驅出塞丁卯戎王立石敬瑭為
大晉皇帝約為父子之國改元為天福戎王與晉高祖
南行趙德鈞父子與諸將自團柏谷南奔王師為蕃騎

所蹙投戈棄甲自相騰踐擠于巖谷者不可勝紀而已
帝聞晉安寨為敵所陷詔移幸河陽時議以魏府軍尚
全戎王必憚山東未敢南下車駕可幸鄴城帝以李崧
與范延光相善召入謀之薛文遇不知而繼至帝變色
崧蹕文遇足乃出帝曰我見此物肉鷄適擬抽刀刺之
崧曰文遇小人致誤大事刺之益醜崧因請帝歸京壬
申車駕至河陽甲戌晉高祖與戎王至潞州戎王遣蕃
將大詳袞率五千騎送晉高祖南行丁丑車駕至自河

陽時左右勸帝固守河陽居數日符彥饒張彥琪至奏
帝不可城守是日晚至東上門小黃門鳴鞘於路索然
無聲已夕帝遣馬軍部指揮使宋審虔率千餘騎至白
馬陂言踏陣地時諸將謂審虔曰何地不堪交戰誰人
肯立於此審虔乃請帝還宮庚辰晉高祖至河陽辛巳
辰時帝舉族與皇太后曹氏自燔於玄武樓晉高祖入
洛得帝燼骨於火中來年三月詔葬於徽陵之封中帝

在位二年年五十三

五代史闕文晉高祖引契丹圍晉安寨降楊光遠清泰帝至自草懷

京師父老迎帝於上東門外帝垂泣不止父老奏曰臣等伏聞前唐時中國有難帝王多幸蜀以圖進取陛下何不且入西川辛曰本朝兩川節度使皆用文臣所以玄宗僖宗避寇幸蜀令孟氏已稱尊矣吾何歸乎因慟哭入內舉族自焚

史臣曰末帝負神武之才有人君之量由尋戈而踐阼慙德應深及當守以居尊政經未失屬天命不祐人謀匪臧坐俟焚如良可悲矣稽夫社金甲于河壘之際斧眺樓于梁壘之時出沒如神何其勇也及乎駐韋輶于覃懷之日絕羽書於汾晉之辰涕淚霑襟何其怯也是

知時之來也雕虎可以生風運之去也應龍不免為醢
則項籍悲歌于帳下信不虛矣

舊五代史卷四十八